

Banjir: Terengganu dapat peruntukan terbanyak

Oleh WAN ZULKIFLI WAN YAACOB

KUALA TERENGGANU 9 Jan - Pada akhir Disember, musim basah masih tersisa di negeri Terengganu dan Kelantan, dengan hujan terus mencurah di beberapa kawasan.

Ketika angin Monsun Timur Laut masih melanda membawa kelembapan dengan jumlah hujan yang dianggarkan mencecah sekitar 500 milimeter, cerita banjir di negeri ini dijangka masih berlarutan sehingga awal tahun ini.

Walaupun hujan mula kembali reda, namun keadaan memaksa mangsa banjir sentiasa bersiap sedia untuk berpindah sekiranya bencana berlarutan.

Namun, banjir kali ini tidaklah seburuk yang melanda dua negeri ini pada 2013 dan 2014, di samping persediaan yang lebih tersusun dilakukan, selain langkah-langkah pencegahan yang telah digerakkan.

Ketika banjir mula reda, segala keluh kesah masih menjadi bualan, kerugian termasuk kerosakan prasarana mulai dihitung selain tindakan susulan mula digerakkan dalam usaha memulihkan kehidupan.

Tidak kurang pula yang mahu menjadikannya sebagai rencana politik untuk menempelak kerajaan negeri termasuk menjadikan lawatan Perdana Menteri, Datuk Seri Najib Tun Abdul Razak ke negeri ini sebagai isu.

Selain kepemimpinan di peringkat negeri, sudah ramai pemimpin Pusat yang datang meninjau keadaan banjir termasuk Perdana Menteri yang meluangkan masa untuk meninjau dari dekat tentang perkembangan banjir dan urusan mengendalikan mangsa.

Namun, kehadiran Perdana Menteri di negeri ini, walaupun tidak mengumumkan sebarang projek tertentu berkaitan banjir tetap dipersoalkan, seolah-olah beliau tidak memberi perhatian terhadap negeri ini.

Pemimpin negeri turut dipersalahkan kerana tidak meminta atau mendesak Perdana Menteri mengumumkan bantuan untuk Terengganu.

Sesetengah pihak juga membandingkan tumpuan yang diberikan kerajaan Pusat kepada Kelantan semasa musim banjir ini dengan Terengganu yang menurut mereka memerlukan lebih banyak perhatian ketika ini.



DATUK SERI NAJIB TUN RAZAK bertanya khabar sambil memangku salah seorang kanak-kanak ketika menziarah mangsa banjir di penempatan mangsa banjir Sekolah Kebangsaan Banggol Peradong di Kuala Terengganu, semalam. Beliau ditemani Datuk Seri Ahmad Razif Abdul Rahman (kanan) dan Menteri di Jabatan Perdana Menteri, Datuk Seri Shahidan Kassim.

Mungkin ramai yang tidak sedar bahawa Terengganu merupakan negeri yang telah mempunyai pelan terbaik dalam menangani banjir dan dalam usaha memberi khidmat kepada mangsa sehingga dijadikan model di peringkat nasional.

Kepemimpinan negeri telah merangka perancangan keperluan jangka pendek, sederhana dan panjang dengan prasarana yang menuntut kos yang tinggi dan memerlukan pelaksanaan mengikut fasa.

Kerajaan negeri tentunya telah meneliti segala permasalahan berkaitan dengan banjir yang kemudiannya memohon bantuan daripada kerajaan Pusat secara sistematik.

Keyakinan kepemimpinan negara diserlah dalam Rancangan Malaysia Ke-11 dengan lebih RM1 bilion diperuntukkan untuk Terengganu.

Semua ini melibatkan sekurang-kurangnya 21 projek besar di bawah dua kementerian, selain

usaha-usaha lain oleh kementerian lain dan kerajaan negeri sendiri dalam membela nasib rakyat.

Jika disemak, sebagai contoh Kementerian Sumber Asli dan Alam Sekitar memperuntukkan ratusan juta ringgit kepada negeri ini termasuklah untuk menangani isu hakisan pantai yang dihadapi setiap kali tiba musim tengkujuh.

Ia juga melibatkan pelbagai projek untuk menaik taraf tebing sungai dan skim pengairan di seluruh pelosok negeri di samping pembinaan tebatan banjir.

Mungkin ramai yang tidak sedar betapa banjir di sesuatu kawasan di negeri ini tidak berlaku dalam jangka masa yang lama, dan kadar kemusnahan serta nilai kerugian tidaklah begitu besar.

Tidakkah ini juga sebagai nikmat yang dikecapi, hasil kepekaan, kecaknaan dan kepupayaan pentadbiran negeri dalam merancang dan merencanak projek yang mendesak.

Justeru mengapa suasana 'se-

juk tengkujuh' perlu dipanaskan hanya kerana kehadiran Perdana Menteri di negeri ini dilihat sekadar untuk mendengar taklimat, bermesra dan memberi sumbangan kepada mangsa banjir, dijadikan persoalan.

Pelbagai dana telah diperuntukkan oleh kerajaan Pusat, dan sekiranya negeri ini tidak dibantu, kedatangan banjir kemungkinan akan membawa kesan lebih parah.

Mengapa tidak sesekali kita turut mengucapkan tahniah kepada Menteri Besar, Datuk Seri Ahmad Razif Abdul Rahman yang merasa denyut nadi rakyat dalam menghadapi musim tengkujuh.

Juga kepada semua jentera kerajaan negeri dan Pusat, badan-badan bukan kerajaan, sektor swasta dan sukarelawan yang memberikan khidmat tanpa banyak rungutan, ketika sebahagian daripada kita hanya berdiam diri, sekadar menatap di media massa dan mempercayai setiap isu yang diviralkan di media sosial.